

ՍԴՀԿ ԿԸ ԶՕՐԱԿՑԻ ԱՌԻՆԻ ԲԱՐԵԿԱՐԳՈՒՄՆԵՐՈՒՆ


Սոցիալ Դեմոկրատ Յնչակեան Կուսակցութեան Լիբանանի շրջանի Վարիչ մարմինը ներկայացնող պատուիրակութիւն մը, գլխաւորութեամբ ատենապետ ընկ. Վանիկ Տազետեանի, Յինգշաբթի, 3 Յուլիս 2025-ին, այցելեց Պաապտայի նախագահական պալատ, ուր տեսակցեցաւ հանրապետութեան նախագահ ժողէՖ Աունի հետ: Ստերմիկ մթնոլորտի մէջ ընթացած տեսակցութեան ընթացքին Աուն եւ ՍԴՀԿ-



պատուիրակութիւնը խորհրդակցեցան լիբանանեան ու տարածաշրջանային նորագոյն իրադարձութիւններուն շուրջ: Յատուկ անդրադարձ եղաւ երկրի ներքին քաղաքական ու ապահովական զարգացումներուն, ինչպէս նաեւ Աունի գլխաւորած կառավարութեան ծրագրերուն, մասնաւորաբար կեդրոնանալով լիբանանցիներու ընկերատնտեսական խնդիրներուն լուծումին միտող նախագիծերուն վրայ: Ժողովականները արծարծեցին Լիբանանի հարաւային շրջաններուն մէջ տիրող վիճակը եւ շեշտեցին կայունութիւնը ամրապնդելու եւ խորայլեան շարունակական ոտնձգութիւններուն վերջ դնելու կարեւորութիւնը: Խօսելով կառավարութեան աշխատանքին մասին, ՍԴՀԿ Վարիչ մարմինի ընկերները իրենց զօրակցութիւնը յայտնեցին նախագահին ու կառավարութեան կոչ ուղղելով իրականացնելու արմատական բարեկարգումներ, որոնք դրական ազդեցութիւն պիտի ունենան քաղաքացիներու կենցաղին վրայ: Տեսակցութեան ընթացքին քննարկուեցան լիբանանահայութիւնը հետաքրքրող շարք մը հարցեր, ինչպէս նաեւ տարածաշրջանային զարգացումներն ու Լիբանանի վրայ անոնց ազդեցութիւնը: Յնչակեան պատուիրակութիւնը պատրաստակամութիւն յայտնեց աջակցելու նախագահին եւ իր նպաստը բերելու անոր նախագծած ծրագրերու գործարութեան:

ԱՌՒՆ. «ՄԻԱՍՆՈՒԹԵԱՄԲ ՅԱՏԵԼ ԱՅՍ ՓՈՒԼԸ»

Հանրապետութեան նախագահ ժողէՖ Աուն Պաապտայի պալատին մէջ ընդունեց վարչապետ Նաուաֆ Սալամը, որուն հետ քննարկեց երկրին քաղաքական ու ապահովական նորագոյն զարգացումները: Աուն շեշտեց, թէ իր նախագահութեան տարիներուն որեւէ խմբաւորում պիտի չաւտեսուի, այլ



անհրաժեշտ է համագործակցական եւ միասնական ոգիով յաղթահարել մարտահրաւերներով լեցուն այս փուլը: Աուն նշեց, թէ հաղորդակցութեան մէջ է իր սուրիացի պաշտօնակից Ահմատ Շարաայի հետ՝ երկու երկիրներուն վերաբերող հարցերը լուծելու համար: «Լիբանանի մէջ կարելի չէ իրար չեղարկել», յիշեցուց Աուն: Նախապէս Պաապտա այցելած էր նաեւ Ազգային ազատ հոսանքի նախագահ Ժըպրան Պասիլ: Ան պալատէն լրագրողներուն յայտնեց, որ «երբ ապօրինի զէնքը կը յանձնուի պետութեան, բանակը կը պաշտպանէ բոլորը», շեշտելով սուրիացիներու անյապաղ տունդարձին անհրաժեշտութիւնը:

Նախագահը երէկ այցելեց Արդարադատութեան պալատ, ուրիկ դատաւորներուն կոչ ուղղեց վճռելու արդարօրէն եւ հիմնուելով օրէնքներուն վրայ: «Մեղաւոր չիամարեք անմեղ մը եւ անմեղ չիռչակեք մեղաւորները», ըսաւ նախագահ Աուն:

ՀԱՐՈՒԱԾ ԽԱՆՏԻ ՄԷՋ

Իսրայէլեան բռնարարքները անգամ մը եւս մօտեցան մայրաքաղաքին, երբ նախանցեալ օր անօդաչու սարքեր Խալտէի մայրուղիին վրայ թիրախաւորեցին ինքնաշարժ մը: Առողջապահութեան նախարարութեան արտակարգ գործողութիւններու կեդրոնը յայտարարեց, թէ հարուածին հետեւանքով մահացած է մարդ մը, վիրաւորուած՝ երեք ուրիշներ:

ՀԱՅ-ԱՄԵՐԻԿԵԱՆ ՈԱԶՄԱՎԱՐԱԿԱՆ ՅԱՐԱԲԵՐՈՒԹԻՒՆՆԵՐԸ ԶԱՐԳԱՅՆԵԼՈՒ ՄՊԱՍՈՒՄՈՎ

Միացեալ Նահանգներու անկախութեան տօնին առթիւ, Հայաստանի Հանրապետութեան նախագահ Վահագն Խաչատուրեան շնորհաւորագիր յղեց իր ամերիկացի պաշտօնակից Տոնըլտ Թրամփին, որուն մէջ պատրաստակամութիւն յայտնեց աւելի զարգացնելու հայ-ամերիկեան յարաբերութիւնները՝ ներառելով համագործակցութեան նոր ոլորտներ, յատուկ կարեւորութիւն տալով ռազմավարական գործընկերութեան ծեսաչափին: «Բարձր կը գնահատենք Միացեալ Նահանգներու շարունակական աջակցութիւնը Հայաստանի ժողովրդավարական բարեփոխումներուն եւ տարածաշրջանին կայունութիւնը եւ անվտանգութիւնը պահպանելու ջանքերուն», նշուեցաւ նախագահին ուղերձին մէջ:

Վարչապետ Նիկոլ Փաշինեան եւս շնորհաւորագիր յղեց ամերիկացի նախագահին, որուն մէջ բարձր գնահատեց աշխարհին մէջ հակամարտութիւններուն վերջ տալու Թրամփի տեսլականը:

ԱՆԻԻ ՄԱՅՐ ՏԱՃԱՐՆ ԱԼ ՄԶԿԻԹ

ԵՈՒՆԵՍԲՕ-ի համաշխարհային մշակութային ժառանգութեան ցանկին մաս կազմող Անի մայրաքաղաքի հնագիտական վայրին մէջ գտնուող հանրածանօթ Մայր տաճարը կը վերանորոգուի: Թրքական «Անատոլիւ» լրատու գործակալութիւնը



հաղորդեց, թէ վերանորոգումէն ետք տաճարը պիտի գործէ որպէս մզկիթ: Հաղորդումին մէջ, սակայն, ոչ մէկ նշում կայ տաճարին եւ ընդհանրապէս քաղաքին հակականութեան մասին: Մայր տաճարը կը ներկայացուի որպէս Ֆէթիհ մզկիթ, աւելցնելով թէ ճարտարապետը Տրդատն է: Տրդատը այն ճարտարապետն է, որ վերանորոգած է Իսթանպուլի Այա Սոֆիա տաճարին զմբէթը, որուն համար ալ ան օրին Անիէն հրաւիրուած էր Պոլիս ու ապա վերադարձած Անի:

ԴԵՌ ԿԸ ՇՆՉԷ ՀԱԼԷՊԸ (4)

ՀԱԼԷՊԻ «ՊԱՐՏԷՋ»ՆԵՐԸ

ՆԱԶՕ ԵՐԵՒԵԱՆ

«Պարտէզ»ի մուտքին տարեց հայ պահակը սիրալիր կը բարեւ՝ «մարիապա շապէս, իրամնեցեք»: Խմիչքի ու «մէզէ»ներուն բոյրը հրաշկական մեղմ երաժշտութեան մեղեդիին հետ՝ մեր երկրորդ դիմաւորողը կ'ըլլայ: Նորեկներուն մուտքով, սեղաններուն շուրջ գտնուողներուն խօսակցութիւնը պահ մը կ'ընդհատուի: Ձմնող հայեացքներ, քովքնտի փսփսուքներ կը նշմարուին: Քանի մը երկվայրկեան եւ քաիքահն ու զրոյցները վերստին թափ կ'առնեն առաջուան ոգեւորութեամբ: Անխուսափելի է մուտքէն մինչեւ որոշուած սեղանը հասնիլ ու ծանօթի չիանդիպիլ: Ու օդային բարեւներով ճանչուորներ ջերմօրէն կը



«Վարդանանց» պարտեզը

բարեւեն, ճեփ-ճերմակ օդիի գաւաթը վեր բարձրացնելով՝ «Այւ ռասի Ապու Գէօ, կամ Ապու Խաչօ, Ապու Ակոբ...: Ի դէպ, հետաքրքրական սովորութեամբ, Հալէպի մէջ ընդհանրապէ (եւ յատկապէս ոչ-հայ շրջանակներուն մէջ) տղամարդիկ կը ճանցուին ոչ թէ իրենց անձնաթղթային անուններով, այլ՝ անդրանիկ գաւկին անունով՝ անոր սկիզբը միացնելով Ապու (հայր) բառը:

(Շարունակութիւնը տեսնել էջ 4)

ԷՐՏՈՂԱՆ ԱՐՑԱՆԻ ՄԷՋ

Թուրքիոյ նախագահ Ռեճեպ Թայյիպ Էրտողան ուղղուեցաւ բռնագրաւեալ Արցախի մայրաքաղաք, ուր կը մասնակցի Տնտեսական համագործակցութեան կազմակերպութեան զագաթաժողովին: Թրքական պատուիրակութեան մաս կը կազմեն նաեւ արտաքին գործերու, ընկերային քաղաքականութեան, փոխադրութեան ու ենթակառոյցներու եւ առեւտուրի նախարարները:



ՅԱՅՏԱՐԱՐՈՒԹԻՒՆ ՀԱՅԱՍՏԱՆԻ ՆԵՐՔԱՂԱՔԱԿԱՆ ԻՐԱՎԻՃԱԿԻՆ ՎԵՐԱԲԵՐԵԱԼ

Սոցիալ Դեմոկրատ Յնչակեան Կուսակցութիւնը խոր մտահոգութեամբ կը հետեւի Հայաստանի Հանրապետութեան տարածքին մէջ տեղի ունեցող վերջին իրադարձութիւններուն ու ցնցող բացայայտումներուն: Քննչական մարմիններուն հրապարակած իրեղէն ապացոյցներն ու ծայնագրութիւնները կը փաստեն, որ կանխուած է բժախնդրօրէն մշակուած ահաբեկչական ծրագիր, որուն վերջնական նպատակը իշխանութեան բռնախլումն էր:

Տակաւին տարի մը առաջ հրապարակած յայտարարութեամբ, մենք անընդունելի համարած էինք «Տաւուշը յանուն հայրենիքի» շարժումին մէջ Հայաստանեայց Առաքելական Եկեղեցւոյ ստանձնած առաջնորդող դերը, մտահոգութիւն յայտնելով, որ եկեղեցւոյ՝ քաղաքական գործընթացներուն ներքաշուիլը յոյ է լուրջ հետեւանքներով: Իսկ այսօր, ականատես կը դառնանք աւելի ծանրակշիռ երեւոյթի, երբ, այլ անձնաւորութիւններու կողքին, շարք մը հոգեւորականներ եւս կը մեղադրուին ահաբեկչական գործողութիւններու կազմակերպումին մէջ: Համոզուած ենք, որ եթ օրին Մայր Աթոռը ազդու միջոցներ ձեռք առնէր, մի գուցէ հնարաւոր կ'ըլլար խուսափիլ նման անբաղձալի իրավիճակէ:


Մենք անգամ մը եւս կ'ուզենք շեշտել, որ հաւատարիմ ու զօրավիգ ենք Հայաստանի իւրաքանչիւր քաղաքացիի խօսքի, միտքի եւ հաւաքներու ազատութեան ու ժողովրդավարական հիմնարար իրաւունքներուն: Սակայն վերջին բացայայտումները բացարձակապէս չեն տեղաւորուիր այդ իրաւունքներու սահմաններուն մէջ ու եթ յաջողուէր գործադրութեան դնել այդ դիւային ծրագիրը, ապա երկիրը կրնար յայտնուիլ խոր ճգնաժամի մէջ՝ համազօր 27 Հոկտեմբերի սպանդին:

Յնչակեան կուսակցութեան անունով խստիւ կը դատապարտենք բռնի իշխանափոխութեան ու առիասարակ բռնութեան իւրաքանչիւր արտայայտութիւն, հրապարակային կոչ, առաւել եւս՝ ծրագիր: Ժողովրդավար Հայաստանի իշխանութեան մէկ ճանապարհ կայ, միայն ազատ ու արդար ընտրութիւններու միջոցաւ: Իշխանութիւն թէ ընդդիմութիւն բոլորն ալ պարտաւոր են գործել այդ սկզբունքներուն հիման վրայ, հայրենիքը հեռու պահելու համար անհարկի ցնցումներէ:

ՍԴՀԿ Կեդրոնական Վարչութիւն
4 Յուլիս 2025

«ՆԻԿԻԱԿԱՆ ՀԱՆԳԱՆԱԿ»-Ը ԵՒ ՀԱՅ ԵԿԵՂԵՑԻՆ

Նիկիոյ մէջ հաւաքուած երեք հարիւրէ աւելի քրիստոնեայ հայրապետերն ու աստուածաբանները, երկարատեւ քննարկումներէ, թեր ու դէմ կարծիքներէ եւ վերլուծումներէ ետք՝ իվերջոյ հասան եզրակացութեան մը: Այդ եզրակացութիւնը Արիոս երեցի տեսակէտին կտրուկ ժխտումն էր: Նիկիոյ ժողովը Արիոսն ու անոր հետեւորդները աղանդաւոր (հերետիկոս) հռչակեց, դատապարտեց ու մզովեց: Արիոս վտարուեցաւ եկեղեցիէն ու շուրջ տասը տարի ետք մահացաւ Կ. Պոլսոյ մէջ, յառաջացեալ տարիքին:



Եկեղեցին հարկ տեսաւ, այսպէս, ինքզինք ու իր հաւատքը պաշտպանել սխալ կամ անճիշդ ուսուցումի մը դէմ, որ այս պարագային Քրիստոսի աստուածութեան ուրացումն էր:

(Շարունակութիւնը տեսնել էջ 2)

ԴԵՌ ԿԸ ՇՆՉԷ ՀԱԼԷՊԸ (4)

Հալեպի մէջ, երեկոյեան ժամերուն, աշխատանքն ետք «պարտեզ» երթալը գեղեցիկ աւանդութիւն մըն է, որ կը ծառայէ ոչ միայն իբր ճաշարան, այլ նաեւ ընտանեկան համգիստի ինքնատիպ ձեւ մը, ջերմ ու բացօթեայ մթնոլորտի մէջ: Ընտանիքներ՝ մեծով-պզտիկով, իրենց տան մէջ ընթերցու փոխարէն, կը հասնին հայկական «պարտեզ»ներէն մէկը, որոնք բոլորն ալ իրենց տուններէն ինքնաշարժով առաւելագոյնը տասը-տասնհինգ վայրկեան հեռաւորութեան վրայ կը գտնուին:



«Դալար այգեստան» պարտեզը

Հոն կարելի է նաեւ կազմակերպել տարբեր միջոցառումներ՝ տարեդարձներու, կնունքներու, խօսքեկայի ուրախ հաւաքոյթներ, որոնք, ուրիշ ճաշարաններու կամ զբօսավայրերու հետ բաղդատած, բոլոր «գրպաններու»ն կը յարմարի: Օրինակ «Դալար»ի մէջ ականատես եղանք 2 առիթներու՝ կնունքի եւ խօսքեկայի: Իսկ «Կրթասիրաց»ի մէջ նախակրթարանէն վկայականի եւ նշանտուքի հիւրասիրութեանց:

Այս գեղեցիկ աւանդութեան ծննդեան թուականն գաղափար չունիմ, սակայն լաւ գիտեմ որ ունի տասնամեակներու պատմութիւն: Այսօր կը գործեն ճեմարանի՝ «Տիգրանեան», Կրթասիրացի, Հ.Մ.Ը.Մ.-ի, «Միսիթարեան»ի, «Վարդանանց»ի, «Դալար այգեստան»ի, եւ «Վասպուրական»ի պարտեզները: Վերջին երկուքը շէնքերուն չորրորդ կամ հինգերորդ յարկին վրայ կը գտնուին, երբեմն «տանիք»ը անուանումով կը յիշուին:



«Տիգրանեան» պարտեզը

Այս պարտեզները անցելէն մինչեւ օրս հայապահպանման դիտանկիւնէն կարելոր դեր կը կատարեն: Նոյնքան կարելոր, որքան դպրոցները, ակումբներն ու եկեղեցին: Ոչ ոք կը գիտակցի ասոր մասին: Անոնք միասնութեան եւ հաղորդակցութեան վայրեր եղած են՝ ուր ընկերային հայ շրջանակները թով-թովի կը մէկտեղուին, հոգ չէ թէ անոնք տարբեր սեղաններու շուրջ նստած ըլլան, սակայն անպայմանօրէն պիտի գտնուին ծանօթներ, որոնք իրար սեղան պիտի այցելեն եւ որպիսութեան վերջին լուրերը առնեն, ուր ընկերային կապերը կ'ամրապնդուին, տիկիները՝ որոնք երկար ժամանակէ իրարու չէին հանդիպած՝ պիտի երկա՛ր գրուցեն, գաղթող մէկ ազգակիցին մասին հարցնելով կամ քիչ մըն ալ... բանքաստելով: Պատահական չէ, որ այս «պարտեզ»ները դարձած են հալեպա-

Շարունակուած էջ 1-էն

հայութեան սրտաբաբախ կէտերը՝ տեղ մը, ուր կարելի է մոռնալ քաղաքին հոգեքը, կրկին շնչել մտերմիկ մթնոլորտը եւ տեսնել... թէ ով՝ ուր հասած է, ով՝ որ ուղին ընտրած է:

Դժբախտաբար լիբանանահայներս այս յոյժ կարեւոր աւանդոյթն զրկուած ենք: Մենք անբախտ ենք այս իմաստով: Բազմաթիւ միութիւններու եւ անոնց յարակից օղակներու ներկայութեան, չկայ գէթ մէկ «պարտեզ»: Փորձեր եղած են կամ կ'ըլլան, սակայն Հալեպի աւանդական շարունակական հետեւողականութիւնը եւ ոգին չգոյացաւ այստեղ:

Վստահ չեմ, թէ ուրիշ ո՞ր գաղթօճախին մէջ հայերը ունին «պարտեզ»ի այս գեղեցիկ աւանդոյթը: Լսած են Պաղտատի, Գահիրէի, Աղեքսանդրիոյ մասին, սակայն արդեօ՞ք տակաւին կը շարունակուի այդ սովորութիւնը, գաղափար չունիմ:



Կրթասիրացի պարտեզը

Ինծի համար մեծ ուրախութիւն էր Հալեպի մէջ վայելել այդ մթնոլորտը, որոնք անցեալի անվերադարձ յուշեր կ'արթնցնէին: Խոր հրծուանք մը կ'ապրէի տեսնելով հայերն հոն մէկտեղուած, մամիկներ, ալեհերներ, գործի մարդիկ, կիներ եւ նամանաւանդ երեխաներ, որոնք բջիջայինէն ծերբազատուած կարելիութիւն ունէին ազատ խաղալու, զննակով վազվզելու եւ իրենց «էներժի»ն դատարկելու:

Քննաքննական երեւոյթ էր հայկական պարտեզներուն մէջ տեսնել ոչ-հայ ընտանիքներ, «բարձր» դասակարգի պատկաճոր: Այս երեւոյթը բազմակողմանի նշանակութիւն ունի հայ համայնքին համար: Սա կը նշանակէ յատկապէս, որ ոչ-քրիստոնէայ զանգուածը ինչքա՛ն մեծ համարում եւ վստահութիւն ունի հայերու վրայ, որքա՛ն խոր են անոնց սերն ու համակրանքը հայ գաղութին հանդէպ: Ուրեմն անոնք բարձր կը գնահատեն նաեւ հայկական ակադեմիկ բազմազան ճաշատեսակները, այնքան մը, որ «կ'անտեսեն» նաեւ դրացի սեղաններուն վրայի ոգելից խմիչքի շիշերուն գոյութիւնը: Բնականաբար ոչ-քրիստոնէայ շրջանակներու ներկայութիւնը հայկական միջավայրին մէջ նախանցեալ տասնամեակներուն համեմատ բաւական աւելցած է, սակայն «պարտեզ»ի այս ներկայութիւնը բազմանշանակ քաջալերական իմաստ ունի թիւով նօսրացած Հալեպի գաղութին համար:

Շատ-շատեր Հալեպէն մեկնեցան անվերադարձ: Տակաւին շնչող քաղաքէն հեռացան աշխատող ծեռքեր, մտաւոր գրիչներ, ուսուցանող շունչեր, ղեկավարող միտքեր: Թերեւս ընկերային եւ ապահովական լաւ պայմաններու մէջ են անոնք: Իրենց ապրած երկիրներուն մէջ (հայրենիքն ալ նկատի ունիմ) անոնք հաւանաբար կը գտնեն ամէն ինչ՝ բացի մէկ բանէ: Վստահ եմ, որ անոնց մեծամասնութիւնը, տարեց թէ պատանի, կին թէ տղամարդ անհուն կարօտով կը փնտռեն Հալեպի մտերմիկ օրերը եւ յատկապէս Հալեպի «պարտեզ»ները:

ՎԵՑ ԾԱՄԲՐՈՐԴՆԵՐ ՄԻԱՅԱՆ
ՀԱԳ-Ի ԿՐԹԱԿԱՆ ԵՐԹԻՆ

28 Յունիս 2025: Այդ օր երեկոյեան Հայ աւետարանական գլխիճը տուաւ իր 98-րդ հունձըը: Եկեղեցական, կրթական եւ համայնքային պատասխանատուներու ներկայութեամբ ու իրենց ծնողաց եւ ուսուցիչներուն ուրախ եւ յուզուած նայուածքներուն դիմաց, ՀԱԳ-ի վեց շրջանաւարտները եկան ամբողջացնելու դպրոցի 1642 շրջանաւարտներու փառանգը:



Հանդէսը սկսաւ ժամը 8-ին՝ հանդիսաւոր մուտքով ու շարունակուեցաւ քայլերգերու ունկնդրութեամբ (կենդանի կատարողութեամբ ՀԱԳ լարային եռեակի՝ Անտրիա Տեմիրճեան, Հրակ եւ Գեորգ Պալեաններ), առաջնորդութեամբ եւ ընկերակցութեամբ պարոն Հենրի Իշխանեանի:

Հայ անա. առաջին եկեղեցիի հովիւ՝ վերապատուելի Ժորայ Ղազարեանի աղօթքէն ու տնօրէնի ողջոյնի եւ շնորհակալութեան խօսքէն ետք, օրուան պատգամը յղեց ՀԱԳ 2004-ի շրջանաւարտ, Հայաստանի ամերիկեան համալսարանի Ընդունելութեան գրասենեակի տնօրէն օրիորդ Մեղրի Խօջեան, որ յիշել էտք իր աշակերտական օրերը, մեծ

դրուատիքով ու երախտագիտութեամբ անդրադաձաւ դպրոցի ձգած ազդեցութեան իր կեանքին վրայ, ապա շրջանաւարտներուն յղեց կեանքի մէջ յաջողութեան հասնելու կենսական խորհուրդներ:

Աւարտական հանդէսին գեղարուեստական բաժինը կը բաղկանար ասմունքէ՝ «Հոգին հայկական», Ժ. Ս. Յակոբեան (6-րդ դասարանի շրջանաւարտներ Սերեմա Հատատ եւ Հրակ Թերզեան), պարէ՝ «Նազպար» (12-րդի շրջանաւարտներ Սելի-Ռոզի Շահինեան եւ Դալար Տազեան) եւ նուազէ՝ «Վարդագոյն աղջիկների պարը», «Դափամա» եւ «Ազգ Փառապան» (ՀԱԳ լարային եռեակ):

Վկայականներու եւ մրցանակներու բաշխումէն ետք, յանուն շրջանաւարտներուն իրենց ուղերձը կարդացին Սելի-Ռոզի Շահինեան (հայերէն) եւ Արին Պատաճեան (արաբերէն):

Շրջանաւարտներուն ուղղուած իր հուսկ բանքին մէջ տնօրէն դոկտ. Արմեն Իւրմէշեան, կեղծանալով «խաղաղութիւն» բառին վրան, թելադրեց շրջանաւարտներուն, որ կեանքի մէջ ըլլան խաղաղութեան գործակիցներ:

Գեղեցիկ աւանդութեան համաձայն, 1965 տարուան լիբանանաբնակ չորս շրջանաւարտներ ստացան վերերան շրջանաւարտի վկայագիր եւ յուշատախտակ՝ ձեռամբ հովիւին եւ հոգաբարձութեան ատենապետ պարոն Ներսէս Պաղտոյեանի:

Վերապատուելի հովիւին առաքելական օրհնութեամբ աւարտեցաւ երեկոյին պաշտօնական մասը, սակայն պահը երկար շարունակուեցաւ հիւրասիրութեան մը ընթացքին:

ՈՒՍՈՒՑԻՉԻ ԿԱՐԻՔ

Հայ աւետարանական գլխիճը (Քաղաքի հայ սքոլ) կարիքը ունի Ուսողութեան (Mathematics) ուսուցիչներու: Համապատասխան վկայականն ու փորձառութիւնը պայման են:

Հետաքրքրուողներ կրնան իրեն CV-ն ղրկել job-satschool@outlook.com հասցէին

ՊԱՏՄՈՒԹԵԱՆ ՄԷՋ ԱՅՍՕՐ

5 Յուլիս 2025: Տարուան 186-րդ օրն է: 2025-ի աւարտին կը մնայ 179 օր:

Դէպքեր-տօներ

1995 - Հայաստան – Սահմանադրութեան օր, պետական տօն՝ նուիրուած ՀՀ Սահմանադրութեան ընդունման յիշատակին:

1954 — Էլվիս Փրեսլիի առաջին ծայնագրութիւնը, «That's All Right» երգով բացուեցաւ նոր՝ ռօք-ըն-ռօլի ժամանակաշրջանը:

1962 — Ալճերիոյ անկախութիւնը, երկար ու ծանր պայքարէ ետք՝ Ալճերիան վերջապէս անկախութիւն ձեռք բերաւ Ֆրանսայէն:

1996 — Տօլլի ֆինն-տորսեթ ցեղատեսակի էգ ոչխար, ծնած է Էտինպուրկի մօտակայքը՝ 1996 թուականին: Ան դարձաւ առաջին կաթնասունը, որ յաջողութեամբ կրկնօրինակուեցաւ չափահաս բջիջէ՝ զիտական մեծ յեղափոխութիւն մը ազդարարելով կենսաբանական ոլորտին մէջ: Տօլլի ծնունդը ներկայացուեցաւ 1997-ի Փետրուարին:

1811 — Վենեզուելայի անկախութիւնը Սպանիայէն, Վենեզուելան դարձաւ առաջին սպանախօս ամերիկեան երկիրը, որ հռչակեց անկախութիւն:

1950 — Իսրայէլի «Վերադարձի մասին» օրէնքը, Քնեսեթը ընդունեց «Վերադարձի մասին» օրէնքը, ըստ որուն՝ իւրաքանչիւր հրեայ աշխարհի որեւէ կէտէն կրնար ներգաղթել Իսրայէլ եւ քաղաքացիութիւն ստանալ:

Ծնունդներ

1813 — Գեորգ Դ. Կոստանդնուպոլսեցի (1813 – 1882) ծնած է եկեղեցական աստիճաններով բարձրացած է Օսմանեան կայսրութեան մայրաքաղաքին մէջ: Ան Ամենայն Հայոց Կաթողիկոս ընտրուեցաւ 1866 թուականին:

1911 - Ժորժ Փոնսիլիոս (1911 – 1974), Ֆրանսայի նախագահ (1969): 1962–1968 թուականներուն ծառայած է իբրեւ վարչապետ: Ֆրանսայի պատմութեան մէջ ամենաերկար պաշտօնավարած վարչապետներէն:

1949 — Պարոյր Արշալիրի Հայրիկեան, քաղաքական գործիչ եւ ազգային-ազատագրական գաղափարախօս: Երիտասարդ տարիքէն անդամակցած է գաղտնի գործող Ազգային Միացեալ Կուսակցութեան: Չորս անգամ դատապարտուած է՝ ընդհանուր հաշուով շուրջ 17 տարի անցնելով բանտերու եւ աքսորավայրերու մէջ:



1937 - Տէր Ներսէս արք. Պոզապալեան (1937 – 2009), մտած է Մայր Աթոռ Սուրբ Էջմիածնի Գեորգեան ճեմարան դառնալով սարկաւազ, ապա 1961-ին ձեռնադրուած է Կուսակցուն քահանայ: Ծառայած է Զուիցերիոյ, ապա՝ Մեծ Բրիտանիոյ եւ Իռլանդիայի թեմերուն մէջ, նաեւ 1999-ին՝ իբրեւ կաթողիկոսական տեղապահ:

Մահեր


1908 — Միսաք Կարապետի Մեծարեց (1886 – 1908): 1901-ին կրած դաժան յարձակում մը պատճառ դարձաւ թոքախտի: Չնայած կարճ կեանքին՝ իր ստեղծագործութիւններով Մեծարեցը դարձաւ հայ նորագոյն քնարերգութեան պայծառագոյն աստղերէն:

1988 - Խաչիկ Զաքարի Զաքարեան (1966 – 1988) նկարիչի ու լուսանկարչի հակումներով երիտասարդ: 1988 թուականի Յուլիս 5-ին, «Զուարթնոց» օդակայանին մօտ, ԽՍՀՄ ՌԺԲ-ի կողմէ կրակ բացուեցաւ քաղաքացիական ցուցարարներու դէմ: Խաչիկ սպանուեցաւ՝ դառնալով Արցախեան շարժման առաջին նահատակներէն:

2017 - Աւետիս Եափուճեան (1931 – 2017) եղած է բազմաթիւ յօդուածներու հեղինակ՝ լուսաբանելով գաղութային կեանքը, հայ մամուլի պատմութիւնը եւ Սփիւռքի դերակատարութիւնը ինքնութեան պահպանման մէջ:



ԵՂԱՆԱԿԸ ԱՅՍՕՐ



Պէյրուք (արեւոտ)
Ցերեկը 29/26՝ գիշերը՝ 54% տամուկ

Երեւան (ամպոտ)
Ցերեկը 26/16՝ գիշերը՝ 37% տամուկ

Հալեպ (արեւոտ)
Ցերեկը 36/22՝ գիշերը՝ 18% տամուկ

Դամասկոս (արեւոտ)
Ցերեկը 33/19՝ գիշերը՝ 20% տամուկ

Տուպայ (մասամբ ամպամած)
Ցերեկը 37/32՝ գիշերը՝ 57% տամուկ

Լոս Անճելըս (արեւոտ)
Ցերեկը 28/17՝ գիշերը՝ 45% տամուկ

Սիւոնի – վաղը (ամպոտ)
Ցերեկը 20/10՝ գիշերը՝ 69% տամուկ

Մոնթեվիդէո – վաղը (մասամբ ամպամած)
Ցերեկը 15/8՝ գիշերը՝ 78% տամուկ